



HAURRESKOLEN ANTOLAMENDUA ETA HAURRAK ONARTZEKO ARAUTEGIA

04/03-2024 Erabakia, 2024ko martxoaren 6koa, Haurreskolak Partzuergoko Zuzendaritza Batzordearena, zeinaren bidez onartzen baitira Haurreskolak Partzuergoko plazen eskaintza, funtzionamendua eta haurren izen-emate arauak 2024-25 ikasturterako.

Abenduaren 17ko 297/2002 Dekretuaren bidez Euskal Autonomia Erkidegoko zero urtetik hiru urtera bitarteko haurren Haur Eskolak arautu ziren 2002-2003 eta 2003-2004 ikasturteetarako hiru urtetik beherakoei hezkuntza-arreta eskaini eta familiei laguntzeko zerbitzu espezializatua eskaintzeko helburuarekin.

Eskubide sozialen Europako Printzipioetan dago jasota hurrek eskubidea dutela lehen haurtzaroko hezkuntza eta zaintza eskuragarriak eta kalitate onekoak izateko.

Bestalde, maiatzaren 30eko 75/2023 Dekretuak, Haur Hezkuntzaren curriculuma zehaztu eta Euskal Autonomia Erkidegoan ezartzekoa denak, hezkuntza-sistemaren pedagogia eguneratu eta hezkuntza-helburu berriak ezarri ditu, haurren funtsezko konpetentziak eskuratzea ahalbidetuko dutenak.

Aipatutako manuak betez, Haurreskolak Partzuergoaren helburu dira: a) Familiekin lankidetzan, haurren garapen integrala sustatzea adingabeen eskubidearekiko errespetuaren, ongizate psikofisikoaren eta afektibitate, zentzumen eta mugimen, ezagutza, harreman eta gizarte ahalmen guztien garapenaren ikuspegitik prestatu eta sozializatzearen bidez. b) Ekitatea bermatzen duen prebentzio-hezkuntza bat sustatzea eta, bereziki, gizarte edo pertsona mailan beharrik handienak dituztenei arreta eskaintzea, parekotasuna bilatuta. c) Hezkuntza-ekintzaren hasieratik Euskal Autonomia Erkidegoko bi hizkuntza ofizialetan elebitasuna bermatzeko baldintza egokiak erraztea eta bultzatzea. d) Familiei hiru urtetik beherako hurrei eskainitako zaintza eta arretaren bidez laguntza-zerbitzua ematea, familia eta lana uztartzeko mekanismo gisa. e) Landa-eremuetako biztanleei hezkuntza eta laguntza izaerako zerbitzu baten eskuragarritasuna ahalbidetzea.

Helburu horiei jarraiki, eta Haurreskolak Partzuergoaren estatutuen 18. artikulua ematen dizkion eskumenak baliatuz, Zuzendaritza Batzordeak honako erabaki hau onartu du.

ERABAKIA

Lehena.- 2024-25 ikasturtean Haurreskolak Partzuergoko eskaintza eta zerbitzuaren ezaugarriak eta haurren izen-emate arauak eta irizpideak onartzea erabaki honen Eranskinetan jasotako baldintzetan.

Bigarrena.- Haurreskolak Partzuergoko Gasteizko Haurreskoletan Vitoria-Gasteizko Udalaren eta Haurreskolak Partzuergoaren arteko lankidetzaren hitzarmenean zehazturiko onartze-irizpide eta arauak aplikatuko dira, leihatila bakarraren bitartez.

Eibarren, 2024ko martxoaren 6an.

Jokin Bildarratz Sorron
Haurreskolak Partzuergoko presidentea

Elena Aizpuru Segurola
Haurreskolak Partzuergoko idazkaria



HAURRESKOLAK PARTZUERGOKO PLAZEN ESKAINTZA, FUNTZIONAMENDUA ETA HAURREN IZEN-EMATE ARAUAK 2024-25 IKASTURTEA

1.- Plazen eskaintza

Izena emateko garaian haurreskola desberdinetako plazen eskaintza ikusgai izango da. Familiek eskaintza horretako plazaren batean matrikulatu ahalko dute euren haurra. Hala ere, plaza horiek moldatu ahal izango dira sortzen diren beharrei erantzuteko.

Unitate bakoitzeko haurren gehienezko ratioak honakoak izango dira:

- Urtebete baino gutxiagoko haurren unitateak: 1/8
- Urtebeteko haurren unitateak: 1/13

Haurreskola batean dagokion adin tartean plaza hutsik ez badago, izen-emate epea ez da irekiko adin tarte horretarako.

Azaroaren 16ko 215/2004 Dekretuaren amaierako xedapena garatzen duen 2008ko apirilaren 10eko aginduan jasotzen denaren arabera, Haurreskolak Partzuergoak landagune edo hirigune moduan kalifikatutako guneetan adin desberdinetako haurrak taldekatzeko eskumena izango du. Taldekatze hauek gehienez ere 10 hurrekoak izango dira eta gehienez ere 0 urteko 6 haur izango dituzte antolaketa arrazoiengatik.

Hezitzaile kopuruari dagokionez adierazitako dekretuaren 12. artikuluan jasotakoari jarraituz, funtzionamenduan dagoen gela bakoitzeko gutxienez hezitzaile gaitu bat izango da.

2.- Haurreskolen egutegia

Haurreskolek irailaren 5etik uztailaren 31ra bitartean eman ahalko dute zerbitzua.

- a) Bi langile edo gutxiago dituzten haurreskoletan 208 egunetan emango da haurren arreta zuzeneko zerbitzua.
- b) Hiru langile edo gehiago dituzten haurreskoletan 221 egunetan eman ahalko da haurren arreta zuzeneko zerbitzua.

Haurreskola bakoitzean jarraipen batzordea eratu da Udalaren, familien eta hezitzaileen ordezkaritzak osatuta. Bertan adostuko da egutegia, eta proposamena Haurreskolak Partzuergoari helaraziko zaio, honek onartzeko, 2024ko uztailaren 15a baino lehen.

3.- Ordutegiak

- 3.1.** Oro har, haurrak ezin dira zentroaren barruan 8 ordu baino gehiago egon.
- 3.2.** Hiru ordutegi mota eskainiko dira eta mota bakoitzean, haurren sarrera-irteerarako ordutegi malguak izango dituzte, bitarteko orduetan Haurreskolako hezkuntza alderdia lantzea ahalbidetuz.



Hiriburuetan, Bilbo, Donostia eta Gasteizen haurreskola banatan arratsaldeko ordutegia eskainiko duen talde bat izango da.

- a) Goizeko ordutegia: 7:30etatik 14:00ak arte
Haurren sarrera-irteerak: 7:30-9:30 eta 12:30-14:00
- b) Egun osoko ordutegia: 7:30etatik 16:00ak arte.
Haurren sarrera-irteerak: 7:30-9:30 eta 15:00-16:00
- c) Arratsaldeko ordutegia: Eguerdiko 14:00etatik 19:00ak arte.
Haurren sarrera-irteerak: 14:00-15:00 eta 17:30-19:00

- 3.3.** Egun osoko eta arratsaldeko taldeak abian jarriko dira, dagokion haurreskolan gutxienez hiru hurrek aldi berean eskatzen badute.
- 3.4.** Familiak ordutegia aldatu beharko balute, aldaketa-data baino hamabost egun lehenago jakinarazi beharko dute haurreskolan.
- 3.5.** Arratsaldeko ordutegia duten haurren kasuan, ez da goizeko edo egun osoko ordutegi aldaketarik onartuko. Hala behar izanez gero, izen-emate berria egin beharko da.
- 3.6.** Haurreskolak Partzuergoan lehen aldiz sartzten den haur orok hamar laneguneko egokitzapen aldia beteko du gutxienez haurreskolarekin adostutako orduetan. Helburu horretarako, haur sartu berritza hartuko da Haurreskolak Partzuergoko edozein haurreskoletan baja eta alta artean hiru hilabete edo gehiago igaro badira.

Prozesu horren helburu nagusia haurrak familiaren baitako erreferentzia afektiboen figuretatik bereiztea da. Hasiera batean, gelako hezitzailea erreferentziazko figura bihurtuko da haurreskolan, baina gainerako hezitzaileak ere pixkanaka harreman horretan sartuz joango dira, balizko langile-aldaketek eraginik izan ez dezaten. Hau da, egokitzapen-aldiaren bitartez, familia-esparrutik haratago, haurraren sozializazio-prozesu osoa landuko da, bere garapen integralaren baitan.

4.- Otorduak

- 4.1.** Familia bakoitzak aukeratuko du janaria etxetik eraman ala catering-zerbitzua erabili nahi duen; betiere, catering zerbitzu hori bideragarria denean (batez ere, janari kopuruari eta instalazio egokiei dagokienez).
- 4.2.** Gurasoek bazkaria etxetik eramatea erabakitzen badute termoetan egin beharko da, ez tupperware-etan, haurreskolako instalazioetan janariaren egoera edo kalitate ona ziurtatzeko. Ezinbestekoa da bazkaria beti bero-bero eramatea.
- 4.3.** Catering-zerbitzua erabiliz gero, zerbitzu horren kudeaketa eta ordainketa familiak egingo dute. Zerbitzu horren erabileraren berri Haurreskolak Partzuergoko Plangintza eta Prebentzio Zerbitzuari jakinarazi beharko zaio.

5.- Doakotasuna

2024-25 ikasturtean Haurreskolak Partzuergoko zerbitzua **doan izango da**.



6.- Asistentzia

Haurreskolak Partzuergoak matrikulatutako haurren hileroko asistentziaren jarraipena egingo du berariazko aplikazio informatiko bidez eta Hezkuntza Sailaren Ikuskaritza Zerbitzuaren laguntzarekin. Haurreskoletan izena eman duten haurrei gutxienez hilean %80eko asistentzia eskatuko zaie (behar bezala justifikatutako hutsegiteak ez dira asistentzia faltatzat hartuko).

Haurra haurreskolara joaten ez den bakoitzean mezua jasoko du guraso edo tutoreak komunikazioetarako jakinarazi duen helbide elektronikoan, bere haurra ez dela bertaratu jakinaraziz.

Hutsegite justifikatuak: Hutsegitea justifikatutzat joko da familiak alde zuzenetik jakinarazi baldin badiu haurreskolari.

Hilabete jarraiko hutsegite justifikatuak baino gehiagoko kasuak banan-banan aztertuko dira. Hau horrela, beste 20 lanegun jarraian huts eginez gero, ofiziozko baja eman ahalko zaio haurrari.

Hutsegite ez justifikatuak: Behar bezala jakinarazi gabeko hutsegiteak ez-justifikatutzat hartuko dira. Kasu horietan, behin mezua jasota, familiak justifikatu egin beharko du haurra ez joan izana IKASGUNE web bidezko plataforman erregistratuta edota ohiko bideak erabiliz; aurrez-aurre, telefonoz edo emailez.

Justifikatu gabeko hutsegiteak izango dira ere ezarritako sarrera-irteera ordutegi-mugak ez errespetatzea. Kasu hauetan, egun erdiko falta jarriko zaie ezarritako muga horietan bertarutzen edota ateratzen ez diren haurrei.

Sarrera eta irteera-ordutegien ezarpenaren helburua da hezkuntza proiektuan oinarrituz, haurrei hezkuntza-alderditik arreta bermatzea eta hezkuntza-lana ez etetea. Garrantzitsua da, beraz, ordutegi horiek errespetatzea, haurreskola modu egokian antolatzeko eta sartu-irten horiek guztiek gainerako haurrengan eragiten duten egonezina saihesteko.



HAURRESKOLAK PARTZUERGOA
2024-25 IKASTURTEAN HAURREN IZEN-EMATE PROZESUAREN ARAUAK,
LEHENTASUN-IRIZPIDEAK ETA EGUTEGIA

1. Onartze-irizpide orokorrak

1.1. 2023 eta 2024 urteetan jaiotako haurren guraso edo legezko tutoreek Haurreskolak Partzuergoko zentroetan plaza eska dezakete. (Udalerrian 2 urteko gelarik eskaintzen duen ikastetxerik ez badago, 2022an jaiotako haurrek ere plaza eska dezakete udalerrri horretako haurreskolan).

1.2. Haurreskola zabaltzeko 3 hurrek eman beharko dute izena, gutxienez.

Behin haurreskola zabaldu ondoren, bi haur edo gutxiagok bakarrik jarraituko balute, hiru hilabetez mantenduko da zabalik eta goizeko ordutegia bakarrik eskainiko da. Aldi horretan matrikula berririk ez baldin badago, haurreskola itxi egingo da ikasturte horretarako.

Egoera horretan matrikulatuta geratzen diren haurrak lehentasuna izango dute plaza libreak dituzten beste haurreskola batean izena emateko.

1.3. Baldin eta eskari guztietarako behar adina plaza ez badago, aurkeztutako eskaerak barematu egingo dira onartuak izateko, arau hauen hirugarren atalean ezarritako lehentasun-irizpideen arabera.

1.4. Onartuak izan ez diren eskaerak itxaron zerrendan geratuko dira.

1.5. Itxaron-zerrenda duen haurreskola batean plazaren bat libre geratzen bada, zerrendako lehenarekin jarriko da harremanetan Haurreskolak Partzuergoa. Aste bat emango zaio familiari erantzuteko eta gehienez ere, haurreskolako hurrengo hilabetearen lehen lanegunean hasiko da. Lokalizatu ezin bada edota plazari espresuki uko egiten badio, itxaron-zerrendatik kanpo geratuko da eta plaza zerrendako hurrengoari eskainiko zaio.

1.6. Izen-ematea baieztatzean, haurra haurreskolako hurrengo hilabetearen lehen lanegunean hasiko da dagokion haurreskolan. Justifikaziorik gabe hala egin ezean, bere eskaeran atzera egin duela ulertuko da eta ofiziozko baja emango zaio.

1.7. Hasiera-datan ez da atzerapenik onartuko. Hala behar izanez gero, hurrengo hilabeteko izen-emate prozesuan hartu beharko du parte haurrak.

1.8. Haurra ez da onartua izango baldin eta gurasoak jaiotza baimenaz gozatzen ari badira edota haurra zaintzeagatiko eszedentzia egoeran egon eta arrazoi horrengatik laguntza ekonomikoa jasotzen badute. Eszedentziagatiko dirulaguntza jasotzeko epe muga haurra haurreskolan hasi eta hilabete batekoa izango da.

a) Gurasotasun baimenik ez dutela justifikatzeko urtebete baino gutxiagoko haurren gurasoek edo tutoreek gurasotasun baimenaren gaineko Gizarte Segurantzaren ebazpena aurkeztu beharko dute. Baimenaren hamasei asteak justifikatu behar dira. Beraz, 16 asteak hartzeari buruzko Gizarte Segurantzaren ebazpenik ez izanez gero, gainerako asteak noiz hartuko diren zehazten den enpresa-ziurtagiria aurkeztu ahal izango da.

Ezin izango da inskribatu baldin eta bi gurasoen artean lau aste baino gehiago hartzeko geratzen badira haurra haurreskolan hasi beharreko datan. Guraso bakarreko kasuan ere, egun osoko ordutegia egin ahal izateko, gehienez gurasotasun baimenaren lau aste eduki ahalko dira hartzeko.

Gurasotasun baimena jardun partzialean hartzen den kasuetan, betiere gurasotasun baimenaren 16 asteak justifikatzen badira, haurra haurreskolan has liteke.

b) Eszedentzia kasuak:

b.1) Eszedentzia-egoeran ez daudela justifikatzeko, Gizarte-Segurantzaren lan-bizitzaren egiaztagiri eguneratua aurkeztu beharko da (aldi baterako lan-uzte egoera eszedentzia egoerarekin parekatuko da izen-emate ondorioetarako).

b.2) Eszedentzian egon eta dirulaguntza ez dela jasotzen egiaztatzeko, Eusko Jaurlaritzan familia alorrean eskumena duen Sailean datuak kontsultatzeko baimen agiria sinatu beharko da.

Eszedentzia egoeran egon baina haurra haurreskolan hasi eta hilabeteko epean lanera itzuliko diren guraso edo tutoreen kasuan, enpresa ziurtagiria ere aurkeztu dezakete laneko itzulera data zehaztuz.

c) Gurasotasun baimenarekin edota eszedentzian egon eta dirulaguntza jaso arren, haurrak matrikulatu ahal izango dituzte honelako kasuetan, baldin eta baremoaren arabera plaza lortzen badute:

- Gaixotasun larria duten gurasoen kasuan, dagokion mediku ziurtagiriarekin egiaztatuta.
- Guraso bakarreko familien kasuan, araudi honen 3.7 puntuan zehaztutako moduan egiaztatuta. Kasu honetan goizeko ordutegian eraman ditzakete haurrak haurreskolara.

1.9. Oraindik jaio ez diren haurrak ezin izango dira inskribatu.

1.10. Haurrek 16 aste beteta izan beharko dituzte haurreskolan hasterakoan.

1.11. Izena emateko ezinbestean aurkeztuko dira ondoren zehazten diren agiriak:

- a) NAN edo AIT atzerritarren kasuan (AIT ez dutenek, pasaportea aurkeztu ahalko dute)
- b) Familia liburua edo erregistro zibileko inskripzioa
- c) Gizarte Segurantzaren lan-bizitza eguneratua
- d) Urtebete azpiko haurren kasuan, gurasotasun-baimenaren gaineko Gizarte Segurantzaren ebazpena

2. Baja ematea

2.1. Matrikulatutako haur bati baja eman nahi izanez gero, haurreskolari jakinarazi beharko dio familiak haurreskolan eskatutako eta sinatutako baja-ereduaren bitartez, bajaren eguna baino 15 egun lehenago. Baja ematen duten haurrak ezin izango dira berriro matrikulatu ondorengo hiru hilabetean.

2.2. Bi hilabetez hileroko gutxieneko %80ko asistentziara iritsi ez diren haurrei baja emango zaie eta ezin izango dute Haurreskolak Partzuergoan berriro izena eman ondorengo hiru hilabetean (behar bezala justifikatutako hutsegiteak ez dira asistentzia faltatzat hartuko).



- 2.3.** Ofiziozko baja emango zaio ere arrazoi justifikaturik gabe 10 lanegun jarraian haurreskolara joaten ez den haurrari, eta ezin izango du Haurreskolak Partzuergoan berriro izena eman ikasturte horretan.
- 2.4.** Uztailen baja eman nahi izanez gero, baja eskaerak ekainaren 1a baino lehen entregatu beharko dira antolamendu eta kudeaketa arrazoiengatik.

3. Onartuak izateko lehentasun-irizpideak

LEHENTASUN-IRIZPIDEAK	PUNTUAK	
	GEHIENEZ	ATALKA
3.1.- Anai-arrebak haurreskolan dagoeneko matrikulatuta egotea	9	
3.2.- Bizilekuaren gertutasuna (kontzeptu hauek ez dira metagarriak) a) Aitak, amak edo legezko tutoreak haurreskolan lan egitea b) Bizilekua haurreskolaren udalerrian izatea (Haurreskolarik ez dagoen kasuetan, bizilekutik gertueneko haurreskolarako esleituko dira puntuak) c) Eskatutako haurreskolaren udalerrian izatea aitaren, amaren edo lege ordezkariaren lantokia	7	7 5 3
3.3.- Aita, ama edo legezko tutoreen lan-egoera (behin-betiko ezintasun iraunkor absolutua lanean jardutearekin parekatuko da ondorio hauetarako) a) Bi gurasoak lanean jardutea b) Guraso bakarreko familietan guraso bakarra lanean jardutea c) Guraso bat lanean eta bestea enplegu bilaketa aktiboan edo ikasketa ofizialak egiten aritzea d) Bi gurasoak edo, guraso bakarreko familia bada, guraso bakar hori, enplegu-bilaketa aktiboan edo ikasketa ofizialak egiten aritzea	5	 5 5 2 2
3.4.- Familia-unitatearen urteko errenta (d azpiataleko puntuak metagarriak dira) a) 2022ko errenta-aitorpenaren zerga-oinarri orokorraren eta aurrezkiaren zerga-oinarriaren batura 70.000€ edo gutxiagokoa bada b) 2022ko errenta-aitorpenaren zerga-oinarri orokorraren eta aurrezkiaren zerga-oinarriaren batura 42.000€ edo gutxiagokoa bada c) 2022ko errenta-aitorpenaren zerga-oinarri orokorraren eta aurrezkiaren zerga-oinarriaren batura 14.000€ edo gutxiagokoa bada d) Eskatzailea ez den adin txikiko seme-alaba bakoitzarengatik	4	 1 1,5 2 0,25
3.5.- Amaren, aitaren, legezko tutorearen edo anai-arrebaren baten desgaitasuna a) Haur eskatzailearena b) Haren amarena, aitarena, legezko tutorearena edo anai-arrebaren batena	3	 3 2
3.6.- Genero-indarkeriaren biktima izatea	2	
3.7.- Familia ugariko kidea edo guraso bakarreko familia izatea a) Maila bereziko familia ugariko kidea izateagatik b) Maila orokorreko familia ugariko kidea izateagatik c) Guraso bakarreko familia bi haur edo gehiagorekin d) Guraso bakarreko familia haur bakarrarekin	1,5	 1,5 1 1,5 1
3.8.- Terrorismoaren biktima izatea	1	
3.9.- Haur eskatzailea harrera-familian egotea	1	



3.1. Anai-arrebak haurreskolan dagoeneko matrikulatuta egotea; 9 puntu.

Atal honetan, adopzio aurreko egoeran nahiz harrera-egoeran dauden adingabeak ere haurreskolan matrikulatutako anai-arrebatzat hartuko dira.

Atal honetako puntuazioa emateko, beharrezkoa izango da eskaria egin duen haurra haurreskolan anai-arrebekin batera egotea.

Haurraren anai-arreba edo guraso izatea egiaztatzeko, familia-liburuaren kopia aurkeztuko da. Familia libururik ez balute, guraso izaera erregistro zibileko inskripzio bidez eta anai-arreba izaera errolda bidez egiaztatu beharko dira.

Haurraren tutore izatea egiaztatzeko, epaiaren kopia edota dagokion ziurtagiri ofiziala aurkeztuko da.

Atal honi dagokion puntuazioa ematerakoan, familia-unitatean legezko tutoretza-egoeran edota behin-betiko nahiz adopzio aurreko harrera-familia egoeran dauden adingabeak ere anai-arrebatzat hartuko dira.

Halaber, atal honetan ematen den puntuazioa zenbatzeko garaian, haurraren zaintza guraso bakar baten gain badago, guraso horren legezko bikotekidea ere haurraren aitatzat edo amatzat hartuko da. Pertsona horren seme-alabak ere anai-arrebatzat hartuko dira haurrarekin batera bizi badira. Egoera hori dagokion errolda-agiriaren bidez egiaztatuko da.

Zaintza duen gurasoaren bikotekidea dela ziurtatzeko, guraso horri zaintza ematen dion epaiaren kopia aurkeztu behar da, eta biak elkarrekin ezkondu daudela egiaztatzen duen familia-liburua edota izatezko bikote direla adierazten duen ziurtagiri ofiziala ere aurkeztu behar da.

3.2. Bizilekuaren edo lantokiaren gertutasuna; gehienez 7 puntu (Kontzeptu hauek ez dira metagarriak).

- Aitak, amak edo legezko tutoreak haurreskolan lan egiteagatik 7 puntu.
- Eskatutako haurreskolaren udalerrian izatea haurraren bizilekua: 5 puntu.
(Haurreskolarik ez dagoen kasuetan, bizilekutik gertueneko haurreskolarako esleituko dira puntuak).
- Eskatutako haurreskolaren udalerrian izatea aitaren, amaren edo lege ordezkariaren lantokia: 3 puntu.

Gurasoak haurreskolan lan egiteagatik puntuak eskuratzeko beharrezkoa izango da izen-emate epean ama, aita edo legezko tutorea haurreskolan lanean aritzea.

Haurra eta aita, ama edota legezko tutorea bizi diren etxea joko da familiaren bizilekutzat. Kasu horretan, haurraren eta guraso edota tutoreen errolda-agiri eguneratua¹ eta Nortasun Agirien (atzerritarren kasuan, Atzerritarren Identifikazio Zenbakia) kopiak aurkeztuko dira familiaren bizilekua egiaztatzeko.

Haurraren guraso izatea egiaztatzeko, familia-liburuaren kopia aurkeztuko da. Haurraren tutore izatea egiaztatzeko, epaiaren kopia edota dagokion ziurtagiri ofiziala aurkeztuko da. Familia-libururik ez balute, erregistro zibileko inskripzioarekin egiaztatuko da.



Aitaren, amaren edota legezko tutorearen lantokia eta eskatutako haurreskola udalerrri berean badaude eskaria aurkeztean, egoera hori kontuan hartzeko aukeratu daiteke bizilekua balioetsi beharrean.

Kasu horretan, lantokia egiaztatzeko, besteren kontura ari diren langileak badira, enpresaren titularrak edo langileen arduradunak sinatutako ziurtagiri eguneratua¹ eta ibilbidea irekita duen gizarte segurantzako lan-bizitzaren ziurtagiri eguneratua¹ aurkeztu behar da. Agiri horrek adierazi behar du haurraren amak, haren aitak edo haren tutoreak enpresa horretan lan egiten duela. Jarduera norberaren kontura bada, jarduera ekonomikoen gaineko zergan altaren ziurtagiria edo udalak emandako irekitze-baimenaren kopia konpultsatua eta lan-bizitzaren ziurtagiri eguneratua¹.

Lantokia eta haurreskola udalerrri berean egoteagatik ematen den puntuazioa zenbatzeko garaian haurraren zaintza guraso bakar baten gain badago, guraso horren legezko bikotekidea ere haurraren aitatat edo amatzat hartuko da. Zaintza duen gurasoaren bikotekidea dela ziurtatzeko, guraso horri zaintza ematen dion epaiaren kopia aurkeztu behar da, eta biak elkarrekin ezkondu daudela egiaztatzen duen familia-liburua edota izatezko bikote direla adierazten duen ziurtagiri ofiziala ere aurkeztu behar da.

3.3.- Aita, ama edo legezko tutoreen lan-egoera; gehienez ere 5 puntu.
(Behin-betiko ezintasun iraunkor absolutua, lanean jardutearekin parekatuko da ondorio hauetarako)

- Bi gurasoak lanean jardutea: 5 puntu
- Guraso bakarreko familietan guraso bakarra lanean jardutea: 5 puntu
- Guraso bat lanean eta bestea enplegu bilaketa aktiboan egotea edo ikasketa ofizialak egiten: 2 puntu.
- Bi gurasoak edo, guraso bakarreko familia bada, guraso bakar hori enplegu-bilaketa aktiboan egotea edo ikasketa ofizialak egiten aritzea: 2 puntu.

Atal honetako puntuazioa eskuratzeko, lan-ibilbidea irekita duen gizarte segurantzako lan bizitzaren ziurtagiri eguneratua¹ aurkeztu beharko da. Erregimen berezietan dauden langileen kasuan (adibidez mutualitate batean daudenak) lan-bizitzaren ziurtagiririk ez badute erregimen honetan altan daudenaren ziurtagiria eguneratua¹ aurkeztu beharko dute.

Behin-betiko ezintasun iraunkor absolutuaren kasuan, Gizarte Segurantzaren dagokion ebazpenaren kopia.

Enplegu bilaketa aktibo egoera egiaztatzeko, LANBIDE Euskal Enplegu Zerbitzuaren LEABD ziurtagiria aurkeztu beharko da, kontsulta egiteko baimenarekin batera. Egoera honegatik puntuazioa lortuko da LANBIDEren irizpideen arabera lan bilaketa aktiboan dauden kasuetan.

Ikasketa ofizialak egiten aritzea egiaztatzeko ikasketen matrikula ziurtagiria aurkeztu beharko da.

Eszedentzia egoerak kontutan hartuko dira baldin eta lan-ibilbidea irekia duen lan-bizitzaren ziurtagiriarekin batera enplegatzaileak emandako ziurtagirian lanpostura itzultzeko data zehazten bada eta data hori gehienez haurra haurreskolan hasi eta hilabete bat beranduagokoa bada.



Aldi baterako gabetze egoera berezia onartu zaien pertsonen, behar bezala justifikatzen badute (Eusko Jaurlaritzaren ziurtagiri eguneratuarekin) eszedentzian daudenen izaera bera izango dute.

Guraso bakarreko familia dela ziurtatzeko honakoa aurkeztuko da: guraso bakarra azaltzen denaren familia-liburuaren kopia edo guraso bati guraso-ahala ematen dion erabaki judizial irmo edo hitzarmen arautzailearen kopia edo behin behineko neurriak ezartzen dituen autoa epaileak berretsia. Familia libururik ez balute erregistro zibileko inskripzioa aurkeztu beharko dute. Halaber, atal honi dagokion puntuazioa zenbatzeko garaian, puntuazioa lortuko da haurraren zaintza guraso bakar batengan badago eta horrela justifikatzen bada guraso horri zaintza ematen dion epaiaren kopia aurkeztuz.

3.4.- Familia-unitatearen urteko errenta; gehienez 4 puntu. (d azpiataletako puntuak batu daitezke atalaren gehienezko puntuazioa lortu arte).

Urtarrilaren 9ko 1/2018 Dekretuan oinarrituz eta 2023ko abenduaren 20ko aginduaren arabera, familia-unitatearen urteko errentaren baremorako irizpideak ezartzen dira:

- a) 2022ko errenta-aitorpenaren zerga-oinarri orokorraren eta aurrezkiaren zerga-oinarriaren batura 70.000 € edo gutxiagokoa bada: puntu 1.
- b) 2022ko errenta-aitorpenaren zerga-oinarri orokorraren eta aurrezkiaren zerga-oinarriaren batura 42.000€ edo gutxiagokoa bada: 1,5 puntu.
- c) 2022ko errenta-aitorpenaren zerga-oinarri orokorraren eta aurrezkiaren zerga-oinarriaren batura 14.000 € edo gutxiagokoa bada: 2 puntu.
- d) Eskatzailea ez den adin txikiko seme-alaba bakoitzarengatik: 0,25 puntu.

Aipatutako puntuazio hori lortzeko, familia-unitateko kide guztien 2022ko Ekitaldi Fiskaleko Zerga Oinarri Orokorrei dagozkien diru-sarrerak hartuko dira kontuan. Familia-unitateko kide guztien urte horretako Errenta Aitorpenaren datuak kontsultatzeko baimena eman beharko dio Haurreskolak Partzuergoari edo dokumentuaren kopia aurkeztu beharko dute edo, hala badagokie, baterako Aitorpenaren kopia.

Zerga-arauek ezarritakoari jarraituz familia-unitateko kideren batek urte horretako Errenta Aitorpena egin ez badu, dagokion Ogasunak emandako ziurtagiri eguneratua (aitorpena egin ez izanarena) diru sarrerak zehaztuz aurkeztu beharko da.

Familia-unitatea osatzen duten kide guztiek errenta aitorpenik ez badute egin edo espainiar estatutik kanpo egon izan badira, dagokion ogasunak edo jatorrizko herrialdeko administrazioak emandako ziurtagiria aurkeztu beharko dute. Ziurtagiri horretan 2022. urtean jaso duten edo dituzten errenta guztiak eta PFEZari egotzi dakizkikeen errendimenduak azalduko dira.

Gizarte-laguntzen hartzaileen kasuan, udalaren gizarte-zerbitzuek edo beste erakunde edota elkarte ongile batzuek egindako ziurtagiria aurkeztu ahal da.



Familia-unitatea

32/2015 Dekretuaren (martxoaren 17koa, familia-politiken eremuan familia-errenta estandarizatzeko sistema erregulatzen duen dekretua aldatzekoa) 4. artikulua araberak, honako osagai hauek dituen hartzeko da familia-unitateak:

- a) Eskatzailea.
- b) Haren ezkontidea, ezkontza-deuseztasunik, banatzerik edo dibortziorik izan ez bada, edo harekin izateko bikote gisa bizi ohi dena, betiere eskatzailea emakumeen kontrako indarkeriaren biktime ez bada eta egoera hori dekretuaren hirugarren paragrafoan ezarritako moduan egiaztatuta badu.
- c) Haien zaintza eta jagoletzapean dituzten eta etxebizitza berean bizi diren seme-alabak

Aita eta ama etxebizitza berean erroldatuta ez badaude eta haien artean ezkontza-loturarik ez badago, adingabearen ama eta aita izateko bikote gisa bizi ohi direla uste izango da, non eta ebazpen judizialaren bidez egiaztatzen ez duten elkarrekin bizi ez direla. Ebazpen horretan bertan emango da semearen edo alabaren zaintza eta jagoletza-erregimenari buruzko erabakia.

Halaber, bikoteko bi kideei buruzko aipamenak sexu bereko pertsonen osatutako bikoteei zein sexu desberdinekoen osatutakoei buruzkoak direla ulertuko da.

Anai-arreben kopurua familia-liburuaren kopia baten bidez egiaztatuko da, eta adin txikiko anai-arrebak bakarrik hartuko dira kontuan. Familia-libururik ez balute, dagokion errolda-agiriaren bidez egiaztatuko da.

3.5. Haurren desgaitasuna edo amarena, aitarena, legezko tutorearena edo anai-arrebaren batena; gehienezko puntuazioa: 3 puntu.

- Haur eskatzailearena: 3 puntu.
- Haren amarena, aitarena, legezko tutorearena edo anai-arrebaren batena: 2 puntu.

Atal honi dagozkion puntuak emateko, aipatutako pertsona horietako batek %33ko edo gehiagoko desgaitasuna izan behar du. Desgaitasuna bi pertsonen edo gehiagoren badute ere, puntuak horietako batengatik bakarrik emango dira; beraz, gehienez, 3 puntu lortuko dira atal honetan, desgaitasuna haurrak berak badu, eta 2 puntu, desgaitasuna aipatutako familiarteko batek badu.

Desgaitasuna egiaztatzeko, dagokion Lurralde Historikoko Foru Aldundiaren Gizarte Zerbitzuek edo Estatuko antzeko beste organo batek emandako ziurtagiria aurkeztu behar da. Desgaitasunaren legezko aitortzea adierazi behar du ziurtagiri horrek eta desgaitasun-maila %33koa edo gehiagokoa dela jakinarazi.

Haurren anai-arreba edo guraso izatea egiaztatzeko, familia-liburuaren kopia aurkeztuko da. Haurren tutore izatea egiaztatzeko, epaiaren kopia edota dagokion ziurtagiri ofiziala aurkeztuko da. Familia libururik ez balute, guraso izaera erregistro zibileko inskripzio bidez eta anai-arreba izaera errolda bidez egiaztatuta beharko dira.



Atal honi dagokion puntuazioa ematerakoan, familia-unitatean legezko tutoretza-egoeran edota behin-betiko nahiz adopzio aurreko harrera-familia egoeran dauden adingabeak ere anai-arrebatzat hartuko dira.

Atal honetan ematen den puntuazioa zenbatzeko garaian, haurraren zaintza guraso bakar baten gain badago, guraso horren legezko bikotekidea ere haurraren aitatzat edo amatzat hartuko da. Pertsona horren seme-alabak ere anai-arrebatzat hartuko dira haurrarekin batera bizi badira. Egoera hori dagokion errolda-agiriaren bidez egiaztatuko da.

Zaintza duen gurasoaren bikotekidea dela ziurtatzeko, guraso horri zaintza ematen dion epaiaren kopia aurkeztu behar da, eta biak elkarrekin ezkondua daudela egiaztatzen duen familia-liburua edota izatezko bikote direla adierazten duen ziurtagiri ofiziala ere aurkeztu behar da.

3.6. Genero-indarkeriaren biktima izatea; puntu 2.

Egoera hori Genero-indarkeriaren aurka oso-osoko babesa emateko neurriei buruzko abenduaren 28ko 1/2004 Lege Organikoaren 23. artikuluan aurreikusitako moduetako batean egiaztatuko da: genero-indarkeria delitu batengatiko kondena-epaia, babes-agindua edo biktimaren aldeko kautelazko neurri bat ebazten duen beste edozein ebazpen judizial, demandatzailea genero-indarkeriaren biktima dela adierazten duten zantzuak daudela agertzen duen Fiskaltzaren txostena edo gizarte-zerbitzuen, zerbitzu espezializatuen edo Administrazio Publiko eskuduneko genero-indarkeriaren biktimentzako harrera-zerbitzuen txostena.

3.7. Familia ugariko kidea edo guraso bakarreko familia izatea; gehienez 1,5 puntu

- Guraso bakarreko familia izateagatik: puntu 1.
- Guraso bakarreko familia izateagatik, bi haur edo gehiagorekin: 1,5 puntu.
- Maila orokorreko familia ugariko kidea izateagatik: puntu 1.
- Maila bereziko familia ugariko kidea izateagatik: 1,5 puntu.

Guraso bakarreko familia dela ziurtatzeko honakoa aurkeztuko da: guraso bakarra azaltzen denaren familia-liburuaren kopia edo guraso bati guraso-ahala ematen dion erabaki judizial irmo edo hitzarmen arautzailearen kopia edo behin behineko neurriak ezartzen dituen autoa epaileak berretsia. Familia libururik ez balute erregistro zibileko inskripzioa aurkeztu beharko dute.

Familia ugaria dela egiaztatzeko, estatuko edozein autonomia-erkidegok emandako agiri ofiziala aurkeztu behar da.

3.8. Terrorismoaren biktima izatea; puntu 1

Egoera hori egiaztatuko da Berdintasun, Justizia eta Gizarte Politiketako Saileko Giza Eskubide, Biktima eta Aniztasun Zuzendaritzaren edo Estatuko edo beste autonomia-erkidego bateko antzeko erakunde baten ebazpen bidez.

3.9. Haur eskatzailea harrera-familian egotea; puntu 1

Egoera hori, dagokion Foru Aldundiak emandako ebazpen bidez egiaztatuko da.



4.- Berdinketa gertatuz gero

Aurreko ataletan lortutako puntuazio handiena hartuko da kontuan, atalak banan-banan alderatuta eta honako ordena honi jarraituz:

- 4.1. Anai-arrebak haurreskolan matrikulatuta egotea edo aita, ama edo legezko tutorea haurreskolan lan egitea aintzat hartzen duen atalean lortutako puntuaziorik handiena.
- 4.2. Haurraren bizilekua edo amaren, aitaren edo legezko tutorearen lantokiaren kokalekua aintzat hartzen duen atalean lortutako puntuaziorik handiena.
- 4.3. Haurren desgaitasuna edo amaren, aitaren edo legezko tutorearen desgaitasuna aintzat hartzen duen atalean lortutako puntuaziorik handiena.
- 4.4. Familia ugariko kidea edo guraso bakarreko familia izatea aintzat hartzen duen atalean lortutako puntuaziorik handiena.
- 4.5. Familia-unitatearen urteko Errentarik baxuena (Zerga-oinarria + aurrezkiaren oinarrien baturarik baxuena).
- 4.6. Abizenen eta izenaren hurrenkera alfabetikoa erabiliko da azken irizpide moduan. Letra bat zozketatuko da, eta puntuazio bereko hautagaiak letra horretatik hasiko dira alfabetikoki ordenatzen. 2024-2025 ikasturterako «P» letra izango da.

5.- Erditze anitzeko kasuetan

Erditze anitzeko kasuetan baremazio prozesua burutu ondoren haur bat onartua eta bestea/k ez onartuak izanez gero, kanpoan gelditu den familia unitateko haurra onartua izango da beste hurrekin batera.

6.- Izena ematea

6.1. Apirileko izen-ematea

2024-25 ikasturtean Haurreskolak Partzuergoan honako egutegi komun hau ezarriko da eskariak aurkezteko eta haurren onartze-prozeduraren epeetarako:

a) Eskariak aurkeztea, online / aurrez-aurre:	Apirilaren 22tik maiatzaren 10era
b) Behin-behineko zerrendak argitaratzea:	Ekainaren 10ean
c) Erreklamazio eta subsanazio epea:	Ekainaren 10etik 14ra
d) Eskareri uko egitea:	Ekainaren 14ra arte
e) Behin-betiko zerrendak argitaratzea:	Uztailaren 1ean
Haurren hasiera-data haurreskolan:	Irailaren 5a

Maiatzaren 7tik 15era arte jaiotako haurrak maiatzaren 24ra arte eman ahalko dute izena. Jaio berri hauen izen-ematea gauzatu ondoren, ezin izango dute dokumentazio berririk aurkeztu.

6.2 Epez kanpoko eskaerak

Irailetik apirilera bitartean, familiak ikasturtean zehar eman ahalko dute izena, online edo haurreskolan bertan eskaera entregatuta. Ekainean eta uztailean ez da haur berririk hasiko.

Epez kanpoko eskaerak **hilabete bakoitzaren 1etik 10. egunera arte** jasoko dira. Behin plaza esleituta, haurrak onartuak izan diren haurreskolako hurrengo hilabetearen lehen lanegunean hasiko dira.

<p>a) Eskariak entregatzea:</p> <p>b) Behin-behineko zerrenden jakinarazpena:</p> <p>c) Erreklamazio eta subsanazio epea:</p> <p>d) Eskaerari uko egitea:</p> <p>e) Behin-betiko zerrendak argitaratzea:</p> <p>Haurren hasiera-data haurreskolan:</p>	<p>Hilaren 1etik 10era</p> <p>Hilaren 17tik 20ra</p> <p>Behin behineko zerrenden jakinarazpenaren hurrengo laneguna</p> <p>Behin-betiko zerrendak argitaratu aurreko azken laneguna</p> <p>Hilaren 21etik 24ra</p> <p>Haurreskolako hurrengo hilabetearen lehen laneguna</p>
---	---

6.3 Eskaerak gauzatzeko prozedura

- Aurreko ikasturtean matrikulatuta dauden haurrek ez dute berriz ere eskaria egin behar, beren plaza automatikoki bermatzen baitzaie, betiere dauden haurreskolan eta ordutegian. Arratsaldeko ordutegia dutenen kasuan, plaza erreserba arratsaldeko ordutegian izango da. Familiaren batek plazari uko egin nahiko balio, apirileko izen-emate aurretik ukoa jakinarazi beharko du dagokion epean.
- Eskaerak online aurkeztu ahal izango dira. Horretarako ikasguneako helbide honetatik egin ahal izango da izen-ematea, <https://ikasgunea.euskadi.eus/>. Paperean ere egin ahal izango dute familiak izen-ematea, haurra matrikulatu nahi den haurreskolan inprimaki eredu ofiziala aurkeztuz.
- Eskaerak aurkezteko epean, eskatzaile bakoitzak haurreskola bakarrean egin behar du eskaera. Eskariak aurkezteko epe berean haurreskola batean baino gehiagotan eskaera eginez gero, eskatzaileak aukera-eskubideak galduko ditu eta egin duen lehen eskaera hartuko zaio kontuan.
- Eskariak onartzeko epea itxi eta gero, ezin izango da dokumentu berririk aurkeztu. Baremorako dokumentuak modu egokian osatu ezean, batere punturik gabe geldituko da atal edo azpiatal horretan. Dena den, horrek ez du eskaria baliogabetzen, ezta beste atal edo azpiataletan lortutako puntuak ere.
- Matrikulatuta egon arren, haurreskolaz aldatu nahi duten haurrek izen-emate epean eskaera berria egin beharko dute ezarritako prozedurari jarraituz.
- Izen-emate prozeduraren ondoren eskatu duten haurreskola berrian behin-betiko onartzen badira, galdu egingo dute jatorrizko haurreskolan zuten plaza.



- g) Ikasturtean zehar haurreskolaz aldatu ahal izango da behar bezala justifikatuta, betiere plaza librerik badago eskatutako haurreskola eta adin tartean.

6.4. Haurren behin-behineko zerrendaren argitalpena

Apirileko izen-ematearen haurren zerrenden argitalpena arautzeko, Haurreskolak Partzuergoa ikasleak onartzeko eta eskolatzeko, urtarrilaren 9ko 1/2018 Dekretuan oinarritzen da.

Izen-emate epea amaitu ondoren, arautegi honetan ezartzen diren epeetan, onartuen eta hautagaien zerrendak argitaratuko dira haurreskoletako iragarki taulan. Baremazioa beharrezkoa izan den kasuetan, baremoaren atal bakoitzean eskuratutako puntuazioa eta puntuazio orokorra argitaratuko dira.

6.5. Haurren behin-behineko zerrendaren aurkako erreklamazioak

Apirileko nahiz epez kanpoko izen-emate prozesuan onartutako haurren behin-behineko zerrendak argitaratu ostean, erreklamazioa aurkeztu ahal izango da horretarako arautegi honetan ezarritako epean, haurreskolan bertan 01PO idatziaren bitartez.

6.6. Haurren behin-betiko zerrendaren argitalpena

Aurkeztutako erreklamazioak ebatzi ondoren, apirileko nahiz epez kanpoko izen-emate prozesuen onartuen eta baztertuen behin-betiko zerrendak argitaratuko dira haurreskoletan eta Haurreskolak Partzuergoko web-orrian, erabaki honetan ezarritako epeak kontutan hartuz.

Era berean, haurreskolek, hautagaien zerrendak argitaratuko dituzte dagokien hurrenkeran ordenaturik, hutsik gelditzen diren plazak bete ahal izateko. Hautagai zerrendak dauden haurreskola eta dagokion adin tartean, bajen ondorioz hutsik gelditutako plazak, zerrenda honetako hautagaiei eskainiko zaizkie zerrendan agertzen diren hurrenkeraren arabera.

6.7. Gorako helegiteak

Izen-emate prozesuan onartutako haurren behin-betiko zerrendak eta itxaron zerrendak argitaratu ostean, gorako helegitea aurkeztu ahal izango du interesatuak Haurreskolak Partzuergoko Zuzendaritza Batzordeari zuzenduta, HILABETE BATEKO epean, argitaratzearen ondorengo egunetik hasita.

¹ Eguneratuak kontsideratuko dira baldin eta dokumentuaren data eta aurkezte dataren artean 3 hilabete baino gehiago pasatu ez badira.